

槐野先生存笱稿

槐野先生存笥稿卷之二十二

左輔王維楨著 館甥渭上南師仲編

書三十四首

答王大廓先生書

答王吾崖侍御書

答陳文岡舊給舍書

與王三渠宮詹書

答傅應臺巡撫書

答貴州大巡張子書

答王石岡總督書

答韓苑洛司馬書

與王南溟兵憲書

與陳巽齋侍御書

與楊南澗總制書

答余伯初司封書

答王大廓先生書

與河西閻監察書

與汪春谷巡撫書

與兗州高太守書

答林平泉內翰書

答張石渠給諫書

與南姜泉太守書

與馮午山大理書

與喬三石大叅書

與王樗菴僉事書

答趙劔門侍御書

與何太華總督書

答孔文谷大叅書

答張太谷司馬書

與張雙渠太守書

答薊鎮趙主政書

答許少華中丞書

與鮑思菴中丞書

答姚惟貞侍御書

奉教東谷先生書

答許少華中丞書

答王石谷給諫書

書

答王大廓先生書

在昔苗寇弄兵自麻陽首難已流毒貴州之境轉薄

更北必且犯蜀蜀有旦夕不測之害蜀執事不爲逆折豫防之計又箴戮力共濟之誠藉口隣人而解患去已於是以言螫先生當其念歸自利而已非有機穽必陷之也乃至譴逮收還印綬法浮于臬萬焉茲其故難究詰矣且撫臣奉 天子命秉鉞萬里之外許之便宜崇其體執凡以震伏戎旅威懾夷獠爲疆域固耳乃當塗君子靡公家念快私憤啟事端折辱大臣破壞國紀率之怨積既盈反中其身歎之恨之方翁在鎮其措置施設皆篤中自信不作虛恢夸毗之習要之累久績效乃章顧行未幾罷去頃張監察

自貴州部中貽書京師以爲九簣功止忠謀晦塞以  
暴先生之寃張子言非謾人人信之然必入告 天  
子下其議于有司其事始大白雖公論在衆口徒嘖  
嘖耳未有補也今苗患示熄至老兩省之師于境上  
而本兵徇言者計增設總督其議益大謬夫總督承  
征討之令有急難則削之然苗孽非可以一舉兵破  
也匿形茂林深箐之中彼能窺我我不能窺彼時時  
出其空隙之際以見傷輒至得意比官軍至則復匿  
不見卽多其徵發利其戈矛將安所用之究其務唯  
在兩省撫臣伏機伺時因其所恃反用之出其不意

批擣之一則創再則懲三則革面向風此計之得也  
往翁在鎮時曾陳平苗便宜詞甚具附敝鄉郭僉憲  
致之會前事錯迕不獲達竟以書返楨守在文墨然  
詞稅非性有惟生長西鄙固嘗講戎馬之役思効鉛  
刀一割之用苟幸得請改職任使當投筆負戈求長  
策以靖外患不至久頓士卒虛耗饋饟也楨今年四  
十有三歲矣逝水不還白日易下誠懼老迫志謝與  
腐朽同耳翁官躋臺府早樹嘉名風雷若變無慮東  
山不 賜環也聞江湖間多霧露惟慎防保嗇副此  
倦倦



本集 卷五  
答王吾崖侍御書

今公所按地卽古桂林象郡之域其民雜獯豸其俗  
黠悍不可理然公至則順習就序矣今日廣西大事  
祇坐征苗用兵耳然苗非可以旦夕破一再舉平也  
攻之不克守之不可久釋之且休則益其輕且教之  
恣此其中固須祕術神智若昔良平之爲計乃始戡  
定如願不然則彼見沒林箐之中迅如驚電譎如鬼  
魅利刃長戟將安所用之近時邊將喜功侷一虜獲  
數級奏謂得計嗟乎此直可明已虜耳非所以示大  
創抑寇心也吾崖沈謀大智能爲 國家解千萬禩

之難而輯和其民人望之俟之語比監司于鷹隼者  
謂其善搏擊也乃今廣西之政不專尚搏擊尤必賴  
倉桑高手旣鍼砭之隨熨劑之斯批抗帖危之上計  
也楨西鄙之人也好言戎事然未由見效衆不謂信  
吾崖肯信不自違別來每與洞山深念之以爲吾崖  
篤中直道爲尤人之尤茲使出必有焯焯在人口者  
會使來適翰音慰我中曲惟慎圖廣益策勲萬里懔  
懔

答陳文岡舊給舍書

今公再遷不離有司有案牘之勞形役之苦然視三

聞大夫長沙太傅則有間矣彼兩賢者旣往遂不返  
其主以爲遺物不問日者 天子追公往疏 詔有  
司問所在今作何官其念之矣譬猶寓寶于主人翁  
惜戀之竟必取也覽周郡志畧則見公之居積繁富  
焉又多自發臆見不襲常故而體例新異與史家頗  
殊乃意主湔洗遂去古律度弗顧矣志中往往思祛  
胡正俗夙念未盡展故云方今務在擊胡而正俗次  
之今上黨郡虜嘗大入掠殺其境內公往守其土鴻  
材鉅畧防禦之固澤人誠賴之而又能正俗明日秉  
大權弘美化則著卜券致可知也鄙人益淺細一無

表見緬懷高風慚汗流洽

與王三渠宮詹書

今起公于野士論嘖嘖以爲邇所希睹亦無不頌  
聖德之明相度之公者可以觀人心矣昨李上舍回  
已具斯事計徹左右禎執執孤植恒謀西還茲公旣  
復青雲當需其至則投謁往耳部咨旣到幸速發勿  
淹久在曲江耽心難斷古有志急公家不告妻子者  
矣又聞歲或起大儀于時公爲宮府大僚若來不及  
事倘煩 聖問持何爲答言之惕然今吏部虛右堂  
不補意或有居功名之會疾趨競逐有道鄙之然遇

合有期得失有數期過數違雖聖賢不自振矣誠知朝野所習勞佚殊性然地執既異性亦隨遷每聞內直諸老夜不交睫或當食奉 詔輒吐哺往至勞苦矣久之又安也斯乃公須臾事耳固宜先事習之也楨疎鹵戇言涉觸冒顧公至卽列大臣傳曰大臣者小臣之表也况值 主上勵精國家多事大臣躬匪懈之節則小臣忘執掌之勞矣三十年來士林計數盛德雅度者必首逮公故去則人惜之來則人樂之至則酬 主知答群望當知有懷而楨猶嗷嗷焉者思効中悃爲秦人光寵耳昔有二人渡河而一人

再三呼曰急渡者後一人者業理楫先登矣則僕說  
實類此也悚恐悚恐

答傅應臺巡撫書

往者西夏之役惠逮一隅而光燭關輔及移江西去  
秦父老無不願見節旌再入思得全沐膏澤者乃今  
復自江西移鎮我土也秦父老誠甚喜以爲天幸神  
假將不棄秦人秦人獲甦也秦中自庚子以來邊氓  
橫罹鋒刃內地騷然至痛苦矣先是撫茲方者睹民  
艱則歎息至振卹則縮手乃謂循習不擾體則宜然  
而五音不調絃柱可勿更乎聖人之治化裁變通民

始弗勑此非中無所有者可能也門下挾弘達之才而又轍跡徧于四方凡人情所便土俗所宜富聞委積比于武庫當必大有慰父老願者鄙人楨固千里隔亦日夜思睹其效爲邦人幸也使來惠錄且予書儀悚汗之甚于其還附言申謝嗣圖顯械門下用展夙私今卒卒未敢讀也

答貴州大巡張子書

貴州試錄至畢讀之則諸製皆洗削陳體言半在昔所未道者僕竊以爲必公所創定非他手可能也序云天將開一方人文之運必有 聖哲之君爲之嘉

矜而振德之可謂頌而非諛華而有實矣仰之敬之  
貴州僻在一隅彼其人文不得與中原埒者非其地  
不生才坐生其地者拘于陋格于習不睹所謂文者  
云何其焉用文於是乃甘自夷而世遂夷之矣歷古  
以來迄今 明興而茲方之文始漸以著夫苟鼓之  
未有弗舞者也今錄序中能發斯旨甚與鄙人之雅  
意合故手錄吟吟不得以他好奪者誠愛之也嘗按  
圖諜見貴州部中列有九溪十八洞其俗夷也而屬  
于漢 國制治因其俗以綏之也有不服用漢法懲  
之以威之也設有桴鼓之警侵暴之事此醜類怙性



要在宣諭防制之耳。藝種千群，咫尺之檄，可定不當。輒勤大衆，煩調度，至以急告京師也。麻陽之役，不戒于初，輕動師旅，遂損三省之甲于境上。繩結蔓連，而不可解，足以鑒矣。峩山旣以振人文于此，而又能定夷情于彼，令文武咸効之，則奉天子詔，按行萬里，還而歸，命誠抗顏無慙矣。鄙人禎本守詞垣，與之校品，執術宜也。乃復說及武畧，冀公爲西南息未萌之患，講鎮壓之策，念局才末効而言，苟獲用功，不必已。楚人不能移跬步而善談慶忌之捷，求捷者安可棄也。僕說正此類，公肯棄之不。

答王石岡總督書

楨鄙人久塵詞曹一無表見比及三考卽已解珮待黜顧復循資序遷出所不意然誠慚誠恐矣乃至遐軫翁懷獎予寵賚若以爲賢者賀而楨實非當也楨愚無所窺識竊嘗考訊古昔大臣在朝廷則朝廷重在邊鄙則邊鄙重故君欲假重則于其人不問外內不計遠邇以藉其力保其大然也今 天子憂在西北而西北節鉞之寄又難其代故久而不還翁于內者以此謂重臣有遠勞則國家無近憂也翰言花馬之役更二序始得還鎮勞旣甚矣然往立斯議者自

謂要竒可扼塞制吭虜莫得進今用之果若所策不也至移撫臣駐固原與督府分守亦可謂棄重捐本舍腹心之養而抹手足之疥癬也凡謀國之臣不貴新異貴要實可長久務在根領不在枝裔也十年以來用其議守之虜或入或不與十年之前事體無甚相遠乃知事在任人險阻次之今翁邊庭越二載虜無一騎敢南牧者卽入輒不利則豈專守花馬之效哉楨以家在西方故恒講訊戎馬之技與制胡之畧耳目旣熟衆議僉同猶懼未當故復請諸下吏顧職掌不在是私爲之定所是耳使者回附言申謝併具

瞽說如此惟教之幸甚

答韓苑洛司馬書

今翁釋柄歸里也凡懷公家念者咸以爲國有老成  
輕重倚之豈宜固引求去而不恤其他此其言非不  
然第論大體不識時變耳公今在靜居中私自追數  
自嘉靖來所登進大臣幾何人能如翁歸幾何人則  
可知達人之稀有末路之難圖也故楨每見翁乞歸  
疏至輒以爲宜者此也翁位不滿才官不究施海內  
人士共歎之他時當有爲明其志者楨雖典紀載事  
顧疎謏駑下不能識遠表鉅爲先達重也慚負之至

夫復何云

與王南溟兵憲書

頃聞礦徒負山聚衆此但欲探利耳其或肆殺掠者  
本吾人入彼巢穴撓之旣苦乃又要利衆怒起而變  
生此小人受役不謹之咎也于誰乎尤爲今日計則  
莫如撤圍緩攻開其出道伺其解散歸里以渠魁姓  
名收捕之此十夫之力可爲也不然高山茂林戈馬  
不得施兵至不知所入不知所出徒以費供給瑣士  
卒耳矧春時百物長茂彼其山蔬巖泉可飲可茹不  
能坐困無何秋至又動防秋之役罷兵而去則威玩

守又不能久獨且柰何斯固明公所熟慮者則鄙人有越俎之臬矣適值潼關李舉人歸輒爲申致如此

與陳巽齋侍御書

今公奉 天子之命按治晉中晉俗好訟其人慄悍猾賊官能制之者輒以法中之故吏于其土者十往九折非吏不盡良俗皆弊民皆頑也自公建節而西持鑑而立奸人憚照燭不敢前俗漸漸更矣仰之歎之襄垣令王尚禮者其政務在制慄悍卽以法中之令患心志不明三人言而市有廬也以書抵楨惶恐之甚楨報令書言公持鑑在上事竟得白宜無憂襄

垣令者渭南人也華渭壤地相接楨自童年與共筆  
硯乃後復同計偕益三十年游矣知令爲人也令廉  
直方正不能媵姍媚世自爲士時恒自盟誓以爲苟  
當一官不爲 國家豎一勲除一患非夫也其素志  
如此今果用是及于難此賢士所扼腕而發憤丈夫  
所仰夫而歎息也楨先令登第十二年方令未第時  
則日夜望其第旣第領宰襄垣則又日夜望其報績  
入也乃令橫罹口語困網羅中楨也情激義重寔傷  
悼痛念之焉昔挑哀解衣而生友馬遷上書而白陵  
誠悲幽志之難明交道之弗立也楨固不類然情義

比于二氏以故罔恤他嫌輒瀆聽覽幸有以察區區也夫法者受之天子使者執法私不得撓顧禎所爲令言者友朋之情私也令苟無臯能俾今得白者法也公所執也禎庸敢以私撓哉始公入晉僕嘗爲令言計必軫于中懷茲語枝贅搦筆戰栗

與楊南澗總制書

丁未之春幸獲謁翁于蒲抵今又三年所矣歲序逝遷而傳者言翁之體力精采強固如曩時一無少損天之庇祐人國乃故願養老成而需于用如此頃南京本兵闕有司以翁名請報不可取他氏代之士



論以爲時非之才才者棄在草野以故乏也楨聞其  
言是之竊又歎天下之務至衆一夫不能兼長必有  
所偏乃今之士人人自賢物物皆具畧無引躬讓能  
之風此老成慎重之才湮沒而不見甘朽而無聞也  
日者苑洛韓公致仕歸人惜其去者十九獨楨以爲  
韓公歸之宜夫才之試也猶寶之售也旣賈不售乃  
恒暴露在外啟傍倪者心則宜匣而蓄之韓公審于  
斯機故輒掉頭去不顧可謂上智大勇近時一覩者  
矣翁居河山之間百年逸游盡日開口而笑卽裴公  
綠野白氏香山其風槩何多此焉楨華下人也熟知

切慕每謂君子苟立勲名于世卽安樂卒歲可也

答余伯初司封書

自去冬抵今兩獲嘉翰手讀之意指標格咸有踔古  
絕塵之致方今修詞之士充溢宇內若取與九崖埒  
指亦不三四屈矣顧所論僕者不中僕之悃語曰知  
面易知心難信夫信夫僕關以西人也從古以來所  
產兼材上智瞭瞭可數而一隅偏能之賢則不可勝  
道矣夫兼材者與之傳經稽理則博引而約歸與之  
搦管摛詞則宏深而奧衍與之應世効用則措注中  
窾十試十功與之介冑卽戎則制馭有術士出死力

以扞外患與之校品古今則倫擬殿最足令死者魂  
驚生者神竦與之論考方域山川險阨風俗移易政  
化宜否及象緯風角妖祥災青之故則種種當實不  
爽也斯數者僕未能擅而間有一獲卽自關中人士  
計之若僕者不可勝道矣夫蕪材之人猶大將也偏  
能猶偏裨也故大將秉鉞偏裨分麾各審所長也古  
以高爵處蕪材庶位置偏能偏能之人不敢妄躡高  
爵自信所具也五味各一嗜五色各一章群材各一  
宜其致同也僕竊自循省所具與所任相背遠甚僕  
所任者筆札之役詞章之事然此非可易易言也必

博蓄如帑高覽如陟法守如畫機圓如丸才決如弩  
神化變通如雲煙禽魚離合隱見不可測擬乃始搦  
管登壇千夫辟易矣僕自歷詞垣十有六載攻之不  
入覓之弗獲間一撰記山夫揭竿野鬪耳非大將之  
律也故曰所具與所任背也僕有一獲則應世効用  
是矣任者旣非具者又不獲効乃偷食大廈與鼯鼠  
伍僕甚赧焉夫効用非難事本之殫厥心耳彼射石  
沒羽揮戈回矚非駭異也殫心之功也僕老髮半改  
惟是心獨赤苟有廉佞者視今所具易今所任布在  
庶位假之柄握責之算數因言求試計歲考實僕誠

驚下然亦瀝膽斷筋往矣如是則慚退神寧悚却而  
體快矣然此志又難以語人獨嘿嘿據促終日閉關  
忽與王生斛語遂次第及之乾唇以自明披腸以見  
慊王生是之公從王生得聞乃獨弗是論辨風刺滾  
滾千百言卒歸之勸沮其言曰古有終身巖廊心冷  
如水殆謂僕有執熱之想邪不謂知僕者矣僕自結  
髮讀書見孟子持志養氣之論輒守以爲鵠旣幸通  
籍金閨叨班玉府未之有改茲所愧者才不副授位  
不量能故時思乞職効用冀得一當以報 天子寒  
熱誰計哉夫富厚豪華災膏之藪執驅威喝殃咎之

門也僕何以爲本無異懷反觸疑喙乃今回腸返始  
守此初服感九崖之諭也

答王大廓先生書

使至詢翁興居安適殊慰遠懷頃有人白翁寃者再  
數月按訊得白卽當還我故印綬矣夫偃龍在池一  
旦起而雲雨人始知神士人之屈伸猶是也今翁人  
龍也起而必有神答衆望矣仰之仰之禎每念賈居  
貨必集萬方之產異域之珍貴賤遠邇纖細弗遺人  
來求物應手與之斯羸利之多耳君子旣以赴功名  
場矣乃問之茫茫任之退退譬之暗室索物昧子涉

塗非徒無獲且有顛踣之虞故積不厚不發學不博  
不試此道古人有之舊聞楊邃菴王晉溪此二老者  
一有論辯率能屈其座人非空事牙頰間人也措之  
事功炳炳矣今讀遺疏其厚積博學可考而知也楨  
以今謀國之臣苟肯廣稽芻究圖所爲安輯計者楊  
王非天人焉弗逮哉翁處江湖上三年矣固知懷于  
牟之慮者鴻蓄淵識伺時宜售且楨所願一時之賢  
者亦在斯也使回附此惓惓嗣須再陳

與河西閩監察書

客自西來者輒道河西百姓歎以爲得公晚向使前

年大侵有公在彼中民命十全可也河西距京師六千里境遠法弛自昔已然而持斧使者往往又收安靜不擾之譽以爲柔遠當如是也夫京師腹心也四陲手足也手足有疥癬不能忍必療之平而後止治遠有異此哉公負才瑋竒力兼萬夫自僕所交游能與等埒者指亦不三四屈也河西有墮業頽俗非賴公振飭之其誰乎人言公在河西窮歷甘梁險涉嘉峪車轍所至便有甘雨嘉禾茂遂士馬騰躍此豈孱懦逡巡之夫可能哉亦赤誠懃懃故効之耳今虜寇東方大將不保謀國之臣爲之廢食且復慮延西北



幸公執筭而臨之驅策將士爲民扞患望之望之舊  
聞海西寇與套虜和親甘州居有熟蕃皆稱隱憂公  
躬涉茲土其講便宜之畧豫徙薪之議當安所出此  
所謂社稷計萬世圖也惟留神無迂鄙人家在秦隴  
倚公非細矧又蒙被優問固謂里有賢者須一禮之  
顧僕非其人也且悚且感使回附謝不盡十一

答汪春谷巡撫書

使至奉翰教始知節旄已駐濟上河道修復由來議  
者非一卒不得其要領是以黃河之水不循而漕河  
恒傷也今幸得公宜諳要領循黃之性而令無傷漕

河可必也乃者狂虜南侵徑薄都城卒來卒應種種  
失措乃知太平之世不得廢武任事之臣不得愛軀  
也使告去急皇皇附言申謝畧拾近事白之嗣圖展  
賀覓順鴻也

與兗州高太守書

陳令訃至其子斗南擗踊悲號屢絕屢禱詣其位  
弔之不覺鼻酸涕下而不可止也陳僕來訃者在側  
因述陳令卒時公爲置棺歛衾含具精且備卽其子  
斗南侍亦若是止無能益也禎聞之卽以慰陳子而  
陳子亦云賴卒時有是耳高家丈人庇我父者委至

矣乃時不肯待卒而又加恩焉卽死猶當大馬報也  
言已復大慟從者皆爲動容往聞公家自王父來號  
稱德門感天之祐子孫爵祿逮及三世而公復仁厚  
惻怛如此天之增埤于高氏者豈其微哉頃之陳子  
告楨曰我父竟坐誣死是誣者殺我父也語曰君父  
之仇不與共天當以死復楨問之曰何以言不共天  
也陳子曰在上者肯明父誣則誣者死而我生不肯  
明父誣則我與誣者俱至死乃所謂不共天也楨勸  
之曰固矣且待之勿遽爲此執事者有裁決不令爾  
父獨死誣者獨生終之當相復也乃陳子始出其在

兗州侍父死者從兄書曰父卒之明日府太公卽收  
繫誣者三人捶之此殆其端兆也幸竟與體之理之  
陳子伏在苦塊荒迷不能作書再拜請代爲謝楨亦  
爲陳子謝

答林平泉內翰書

在都日與公踪跡誠濶絕踈邈然私計我所篤信而  
切慕者則莫平泉公若也近俗漸非施非禮之敬飾  
違心之言乃人人靡矣故今交游中若平泉公者指  
不一二屈也楨西鄙之人不能移其土性執方而往  
宜與物忤乃顧槩于眷懷繫書相訊何其竒也送往

不有贈言慮羞征橐以故罷止誠不謂公既富珠璧而又嗜燕石也使旋會被小恙思一勉抽一章卒未就嗣當附致不食言今時且竣役向吳中矣坐故廬讀古人書悠悠可想或言捐籍獨悟彼窮年竹帛者蠹魚等也卽若所云今論人者舍形骸而專指心神言之雖詳竟昧誰何惟平泉洽識古昔蔑偏枯之見乃敢進其愚說亦因以求正也

答張石渠給諫書

茲往本按功臯覈名實乃公更取自所閱歷衆所謀議事所便宜者具而上聞僕幸得一劄誦之感歎

抵掌以爲近時一睹卽引而儕之昔人若馬伏波之  
聚米趙充國之上圖則何過焉潮河川不可爲謀蓋  
人人難之矣今公欲夾岸起墩架砲防守足當百雉  
之險殊與鄙見合他議皆善若蒙 報可措之施行  
東北可無慮矣朶顏譎恃外脅與國而內恐我人究  
之則我人實誨之又縱之也公謂宜稍從裁抑用威  
保恩是矣至言撫賞漸溢舊額守臣邇相祖述僥倖  
無虞而不爲 國家深長之思則宜根尋本實追懲  
其臯可也茲奉翰教一如對語見面有期延竚延竚

與南姜泉太守書

使回附言申謝計徹左右項者 天子注念戎畧徵  
用才臣在吾鄉則太華何公督統薊邊而少華許公  
尋亦柄授今且嘿嘿待除也獨趙浚谷繫官職方卑  
棲而不獲大振柰人情何自登第二十五歲年矣諸  
與同進者咸躋嵬峻而趙固屈之人下衆共憐之執  
事君子竟當置之便安所也大抵騰抑淹速士各有  
數數及之莫能頡之後數不及莫能引之前也且公  
何負于物望哉尚猶羈跡郡國與庸衆伍亦數未之  
及也苟及之九霄萬里計日可至雲鳥風檣其疾不  
啻也僕生本闇劣未睹 國家之大計偶叨校武之

役徒恐悚不得辭受役成事貽笑無窮公其展錄流覽足信鄙言之非謬也

與馮午山大理書

夏首得公途次書督僕為狀甚力而石渠張子時時又過督之乃七月一日稿具即手遞石渠氏而石渠云適有便使即函致之未知其能達不也大抵孝子之念在顯親揚名故其親之微言細故一無或漏誠不欲沒也而詞家之紀事傳信則固欲實而不浮類而不駁何者五味各一嗜五采各一色五德各一行自大聖以降未有一身而兼總諸行者也况婦道內



子乎以故芟難繁言獨掇其鉅者列編而實錄焉謂  
可傳而信也吾兄詞人之雄長豈以今狀為莽莽哉  
僕典在筆扎猶慚薄技黠胡為患又安能謀誠所謂  
具臣也公夙抱朴忠負才瑰偉今之制虜者計當安  
出議者孰是讀禮之暇慮必逮此春歸鴻便幸惠教  
音

與喬三石大叅書

春末曾具啟一通併會試錄一冊托楚使在臺史周  
吳峯所者致之門下計在必達顧久不奉報音則私  
有疑焉叅伯尊官薇垣重地自他氏得之誠足為榮

至以居君侯則猶循調序遷非超歷有赫古昔所以  
處賢豪者不是拘也乃者黠胡入塞而縱至與我軍  
俱陣于郊畿斯固百年未有之變也而一時任事之  
臣曾莫有出一奇發一矢以與敵爲難者於是天  
子怒甚擧諸任事者乃遂徵召舊人用之何太華  
秉鉞薊鎮士論倚以爲重少華許氏嗣至坐而待除  
二君者皆天下士不獨鄉里稱賢也獨趙景仁者負  
氣大豪自登第二十五歲矣尚令抑首人下鬱鬱而  
不得申衆共憐之久之當有便安所也竊自歎秦人  
方其無事時他則摘發細癥率從擯棄一值有難卽

引使當前焉然則秦人者固治平之贅疣而危急之藥石也言之大噓公挾才瑰竒明習當世之務卽令擁節登壇可以坐却胡騎制勝千里顧時無知之者獨曰喬君詞人之雄長耳淺乎覩矣僕分于時無裨又未嘗學頃乃驅之校武士茲何異借明于瞽也錄成不得匿醜幸門下鑒觀指示焉

與王樛菴僉事書

往奉翰劄歸卽深卧巖扉人事都絕此昔人鑿坏之意非所通于世俗之情也自孔子不可與鳥獸同群而三閭寓言尤忌獨醒夫旣已去國爲山澤逸人矣

併與其山澤游者絕則母乃甚隘乎大江以南率高  
此節士有敝車羸馬毀冠穿履者鄉里爭傳羨之以  
爲難能何者土富俗靡萬人流之一人持之斯一人  
勝萬人也大都尺寸之士度無他立抑情堅忍欲以  
釣竒自通方大士觀之則眇小甚矣公在江南稱正  
士才鄉卽今塌翅林坳天風與便當更冲舉旣不逐  
流幸勿矯亢大過與兢兢尺寸者伍也頃者黠胡躍  
馬直闖郊關士大夫咸用爲憂公固懷子牟之慮者  
計將安出且嘗委質爲臣未得以江湖解也今有三  
人行賈渡江失舟所載俱沒二人者哭貨亡竟倚岸

不  
利  
三  
毀瘠而死一人掉頭不顧去復積著數歲貨既具仍  
賈四方遂營利十倍稱大賈焉夫仕宦之業猶賈也  
士之爲彼二人哭者衆矣若此一人者鮮也公其爲  
此一人者博采會同他日仍遊四方應萬變可也  
且士非執德之難執德而弗固者之難彼局促若轅  
駒落莫若槁木不可望千里至一葉觀也僕關中人  
也關中地瘠而俗樸卽欲釣竒安所効之故僕卒爲  
庸衆人無以竒見至所謂學大賈積著則又自慙赤  
赤似窶人子一物不具見四方客來未嘗不汗沾衣  
也凡此事有難言悉托之喻唯省存勉圖焉開歲鴻

順願聞報音瞻思區區爾故且畧矣

答趙劔門侍御書

今公貽僕書云滇南漢夷雜處事甚叢委此正公所  
能居設在他氏吾不知其能未也日者狂虜入塞而  
縱至與我軍俱陣于郊畿斯實百年未有之變也  
天子神武憤欲興師大創而令有司各獻計求所爲  
擊胡便者於是募軍遣八使而燕趙青齊晉魏諸路  
紛紛出矣督稅遣六使而江南諸郡紛紛出矣選銳  
遣四使而沿邊諸郡紛紛出矣獨兩廣滇蜀坐征苗  
之役得免他皆有舉夫虜僅一入而海內咸動乃所

謂應敵之兵不得輒已者也然其中且有隱憂謂募軍則恐強民所不欲督稅則恐累民所不勝選銳則恐什伍空虛虜牒者知之而抵隙爲患斯三事者惟在諸使者審視機執鈔裁之爾操斷以往不可也顧僕典在文史不得與大議之末欲前而告諸使者復用越俎爲懼念公抱謀國之忠挾批難之才卽身處遐域心實縣于闕下斯懷固同乃爲道迷若此滇夷自漢以來時通時閉國家鑒于往代因俗立官苟令安和不擾卽止不純以中國禮教法制備責之也以故百九十年帖然砥定亦嘗少有侵軼置不與

較言馬羈牛縻走獸蓄之誠取中國之治治之又何  
得言羈縻也公雅稱曠覽深識流輩推轂久矣且旣  
歷茲境益諳委曲苟令漢不撓夷夷來撓我我制之  
有詞脫漢或首事挑怨發難又爲 國家開一兵隙  
僕實憂焉故傳繡衣使者持斧威斷以肅境內然當  
斯之時又涉斯所且須解網與民便宜此所謂柔遠  
能邇以安王國者也夫水激之而飄石轉鬪者其執  
然也惟公亮察毋坐迂誕僕自塵土中與公交今十  
有七歲矣中間離合合離至靡常也茲不言私款者  
豈忘之哉獨公家計重爾南風若便幸惠教音



與何太華總督書

頃翁甫歷 闕廷而聲輒震灼者此豈有宿交密契  
爲之鼓扇其在我又豈常卑詞降色爲之招引人固  
景附之哉寶缺出匣睹者動容瓴甃滿地過之弗顧  
輕重之情異也楨辱在鄉曲之末私歎有翁忼慨若  
此人情又若此異日勲伐立可奏效謂大畧已著而  
吉徵先見也自翁赴鎮後嗣至者纍纍凡與晤言者  
退而咸有軒輊彼其人固善招引者又有爲鼓扇者  
而衆不爲動世有大道物有大情誰可強哉從古以  
來豪傑舉事務先正紀綱明名分其次拊群心定約

束故功成名立而士附也今翁足躡壇上而首正四  
事他人所選悞顧盼莫敢措手者乃翁一舉而定此  
眞所謂竒男子也薊州一路爲長千二百里乃悉委  
翁而恃爲扞蔽苟一隅失守百城之勞棄之無用誠  
知調度部署各有方畧然地形遼遠兵力稀少捉襟  
見肘理所必有翁不于此肯追疏往跡明陳後事使  
成敗利害之執瞭若聚米他日卽有匹馬緣崖注坂  
而下亦我之責無解也常持此計白之三渠公三渠  
公亦以爲然大抵盛名難居重負難勝賁育能任千  
鈞行百步未至咫尺而氣逆足頓人弗勇之矣今士

大夫所注望于翁者非庸庸也固將引韓白頗牧之績相比埒焉惟圖之念之少華翁既到物情士望當爲君侯之亞他氏弗能逮也謀國者擬取昌平經畧之任畀之果爾則兩翁相爲羽翼薊州雖長無憂也聶子感翁之知聞其言卽思亡奔顧憚于自進不如毛遂之烈卒賴翁力呼取聶子則應聲至矣過臘倍寒塞上益甚車騎遠涉苦辛可知幸加餐飯厚衣裘副此惓惓

答孔文谷大叅書

語曰白頭若新傾蓋如故昔誦其言乃今信之矣僕

鄙野謏末人也于時輩爲下陳乃公一見遂引與同  
游解頤示胆披肝見憐僕實依戀歎伏之焉且僕于  
公何嘗有夙昔之緣半面之舊哉乃接遇若是意其  
中必有授者而僕自省牛驥殊才鍾缶不同量固莫  
有能券合者則復吟吟愧訟之矣世俗所尚咸兢兢  
尺寸之間最下者瓦合公高標濶步去流俗何啻千  
尋每與沃洲呂氏言以爲文谷公瑰竒設若不困于  
例令得大振而盡其能蕭曹丙魏之業何足道哉漢  
唐以來柄政豎勳每多椒房之戚誠念其才不欲厄  
塞也 國家監于梁霍著令世守莫之敢變而才豪

之士間亦坐此頃矣歷秋及臘有抱鬱鬱而不得舒  
思見君侯一披豁之又不可得且虜薄郊畿而莫之  
能挫諉之猝變猶似也既去而議所爲挫乃適相甲  
乙各持白黑未有抗身奮舌息衆囂而定 國是者  
前事已然後事柰何此僕拊膺痛腸弗能少寧者也  
且議者疑也國有舉措可者半不可者半則議之謂  
議之則是非決矣今胡騎侵軼明明知疆我兵倒戈  
明明知弱彊斯摧之弱斯振之何議之爲師涓卽善  
聽然瑟竿並奏不辨其指慶忌卽善捷然途徑多歧  
不審其適今 天子方銳情戎畧圖以大挫虜鋒而

謀議者若是此僕拊膺痛腸弗能少寧者也夫國有  
危急而衆共憂之是何忠者之盛也比及任事而復  
相推轂又何讓者之多也此觸目激衷至廢眠食引  
紙搥筆不覺煩贅諒公不以爲誕謾也計吏將翰劄  
至臨去取報屬卒卒不能卽予適便具謝附之愚悃  
春歸鴻順幸惠德音

答張太谷司馬書

僕恒私謂以公器能令提三尺劔卽可豎勳萬里驅  
虜若驅群羊今復徵選士兵爲國增置爪牙事竟而  
歸卽以所自徵選者委之練習聽其調度柰何憂胡

馬哉楚和辨璞孫陽識駿玉若馬無遁焉公將家子  
耳目所睹記熟矣固知所徵選者皆猛士也頃者改  
除金部始符物望然猶未之竒也若欲見公能事必  
襲昔人築壇之貴推轂之榮使手足無礙內顧寡虞  
彼其時乃全錐出囊矣不直端穎露也僕守官詞垣  
平時不能著藏山之指國有危急又不能奮請纓之  
畧每念一至汗淫淫透重袍矣日來叨役校武殊背  
所學乃拾他人咳唾湊泊成錄今函而致之門下幸  
爲評教勿弃捐也使者將翰劄到取報甚遽有懷不  
盡十九仙眷休嘉附此以慰

與張雙渠太守書

往公在金陵再承翰教屬求便不得因稽裁報嗣卽  
有今擢竊以爲若到上黨則申悃易矣顧復悠悠以  
逮于今未能也歎甚歎甚公天性冲泊不慕榮利平  
生襟期誠依顏子世方逐逐蔽華九州一軌乃公獨  
志在是驚美何已顏子不遇乃退而甘節若此今  
聖王御世群材畢奮野無扣角之歌而朝有連茹之  
頌何得違時晦迹不著功名于竹帛間也私恐公志  
不移若拋綬徑歸未可也頃聞旣領潞安數月之間  
抑強扶弱與民安堵舉措興除率人搖頭吐舌而不



敢忤者乃知前扎云云直言其志耳未便真欲陋巷  
居簞瓢食也今之太守一郡安危繫之固須調停變  
通大不離法小不忤情咸與順適則流轂無窮矣若  
膠柱守株不審時變君子謂之節士未通于大道也  
此固公嘗所獨燭者僕言爲贅僕典在文墨尚不良  
于詞又安能講戎馬之執忽叨校武實用汗悚錄成  
不得匿陋附使上覽幸評教毋弃擲也

答薊鎮趙主政書

奉翰諭得悉薊遼經畧已卜大猷又于他處見分區  
圖說瞭若身踏巖谷而目接險阨也大將跋涉之苦

諸君羽翼之勞槩見之矣顧惟目前民力百種浚削  
譬諸數畝之田春取牟麥秋取蔬豆耒耜鋤耨相尋  
于上者如魚鱗地力旣竭何生物之能再也方今築  
塞築堡併舉偕作作之或弗任舉之或弗勝則將柰  
何以僕之見築塞急務築堡次之一功就一事輿斷  
手旣易睹効不難宜白太華大將軍權度事宜燭照  
物情慮未形之變審安內之策具而 上聞聽所裁  
決則消萌定危圖于不見勲名德澤以漸俱收絃急  
斯絕束急斯折理固然也鄙言非誕幸諸公諒之若  
令鄙言得驗始更縵柱晚矣晚矣別離恒情四方男

子所有事也懷思沾戀友朋私昵今且可畧故不縷縷爾

答許少華中丞書

今翁爲陵園守吏矣邊疆守臣能拒虜勿入則內地寧翁亦晏坐府中不得豎竒揚烈也假令東有薊州之警西有居庸之難寢邑地重主上關情所藉以保衛者翁也倉皇告急計將安出禎以事貴豫圖變須早見傳聞紅門以內巖谷層複其徑道可通往來者甚衆塞鑄削垣截山斷澗視要害最甚者則請置戍守之又必躬涉險阨登觀降望斯區裁得體

而設施弗謬也近世宦情苟得善所輒用爲悅不則  
怏怏此無他計便安要蔽利也昌平誠瘠薄部吏星  
稀人士皆知之然亦可以養節完名大臣身任疆場  
豈得顧私願哉 諸陵邏卒逃匿居半與團營之兵  
同勾稽補伍倏集倏散無裨實効與團營之兵同法  
嚴則波瀾喧口然竟不爲患寬則苟安一時而有卒  
然之憂斯兩者相去遠矣不可不審也且事固有難  
難在時執耳至權度時執者人也卒諉之難坐不爲  
理可乎河決川潰崇堤無功固矣然守河者竟宜築  
堤語曰憂國如家言共憂之無詳畧也惟翁保持是

心而已翁負轂當代甫離巖穴而遽領兵符 主上之所垂注縉紳之所具瞻非眇小也彼魏爵重階者豈少乎能揭休光震聽睹者幾何人哉楨辱知且十年所頃奉翰訊輒布悃曲以見企佇言中與否安計也

與鮑思菴中丞書

往翁持斧關中歲無幾何而萬姓繫思若將百年乃者仗鉞驅車再尋舊轍關西父老扶筇望拜經屬不絕楨卽不睹其事直以舊德卜之當知其有是也決歲以來旄頭照在幽朔故西陲甲卒稍得息肩茲復

徵選驍健自離分地遠赴戎行壯夫旣去壁壘空陳  
脫令虜諜者得知擁衆闖塞而入何以應之此不可  
弗憂也翁愛養元元不蹈湯火自松石劉公以還此  
爲再睹顧今邊伍旣缺則抽補之議不得少疑借募  
之令不得不下此議行此令下則閭里騷動誠諭慰  
藉消萌定危自公能事但惟早圖豫見之耳往秋虜  
騎薄我城下一時憂國之士挹憤思振若將有嘗膽  
枕戈之謀者比虜解去更復悠悠左稱方右譽圓匠  
師操斤而莫定措手尋及開歲塞草漸青歎噫之聲  
如昨俱起因思陳湯按劔而叱延壽延壽不辭矯制

之臯竟立郵支之勲兩子戮力揚威萬里况萬人一心又豈憂擊胡哉楨典在筆扎不宜越俎言事顧倚柱之嗟終非甚迂厝火之慮每厯夙夜鬱而弗洩懼成痞鬲以故不恤狂痴爲翁布之曰者談吉凶聽者信而謝之君子言事聽者置不理此馬遷感而作傳以明涉世之難也來謁者爲表弟薄儀將枕具在別啟併冀照存幸甚幸甚

答姚惟貞侍御書

近聞公行部至商州逮捕大猾若干人故皆民間宿蠹衆口稱快聞于旁郡度不能免皇皇竄避者不可

勝數斯可謂真御史矣前按關中者第慈悲大禪師耳非所以禁奸戢暴振紀綱正風俗也寧夏失守爲虜創殘若此之慘仗鉞者不得辭其咎矣今公旣查稽明允不嫌少遲况寧夏屬遠塞哉往年延慶有虜旣部使者盛子匿不以告及告又不情本之護惜撫鎮而遺念生民也今疏列殺虜萬人掠去畜產三萬餘睹者改容因以歎公正直堅實大破舊套不蔽私昵去時輩萬里矣僕又謂三邊甲士各戍分地尚不能支胡乃今復應徵選壯士旣去營壘空存茲憂匪細近在眉睫不可弗慮也見思菴翁當持此議圖之



思菴勁直敏達與之同心干事必濟毋謂我誕也奉  
翰扎加譽溢有祗增慚汗然憂國耿耿矣時事紛異  
人守一說不歸于是浸尋及于今日塞草漸青胡奴  
南望柰何柰何

奉教東谷先生書

去歲獲承翰劄及所著書凡五種於時夏仲惠扇適  
得却暑諸書則坐立觀之不知其夏日之永與炎歊  
之侵也旣見熊子因屬覓便計托報謝而熊子自言  
頃之當以使還身可爲繫帛之鴻已熊子不得還乃  
遂遭延而及于今非飾說曲爲解也古之賢豪得其

時則行不得其時則退而著書卽稗官小說無關體  
要苟當事實亦其志之寓也近世撰述塞于宇宙然  
多是非任情褒抑溢有 國家采風之官不立聽睹  
旣狹則譖牒安托於是懷私忿世之倫藉是獲售而  
洩不平之抱至有隻詞相濺千古蒙垢者矣今翁所  
著殊不蹈此一人一事咸當實不華影常依貌響必  
隨聲異日開局紀事楨卽操是往矣熊子嘗談翁耆  
年而神爽瑩射矯矯如鵠意以爲有異術楨謂不然  
屈平顛顛殷浩書空此皆怫鬱在臆卽習爲大還不  
能澤其貌也惟翁脫弃榮名等之飄瓦四肢百骸認

爲已有固所謂戰勝而肥者無異術也自楨所事數  
師漁翁卒于逆旅松翁正于首丘逝者長畢在者阻  
絕南望雲空不任淒迷晚嘗事鳳泉翁而鳳泉翁頃  
執兵柄值艱危與棲木不殊乃知江鴻海鷗弋人徒  
慕千仞高覽若吾師者鮮也楨濫竽詞曹十有七稔  
蔑咫尺之長須臾之譽往劄稱爲庸視一時聞之面  
熱內慚汗出而食不下也熊子今春始得還竟以書  
屬爲訊江湖無恙焉錄幣二種伴往聊以見區區耳  
惟炤入幸甚

答許少華中丞書

往僕言事誠過激不能作軟語謂在今日固須勇任  
且旣已受檄寧能弛擔逭之他肩哉頃聞勾補缺伍  
八衛漸實而衣甲器械猶煩料理橫谷植木將防衝  
突而望效悠邈尚有急圖禁方滿筭貴在已疾謀臣  
充庭貴在批難東海之水誠多然無救西山之火也  
茲翁兩疏並能效疾而消害然以故事必下其議于  
有司始得報可會京考在俄頃百司肅肅聽斷過此  
當如議也太華何公身秉斧鉞而動輒掣肘邊牆罷  
築兵力又鮮近傳胡騎東馳腕若引轡南向柰何意  
何公自挾上猷此獨區區私憂耳三渠公以制且欲

還則不穀益牢落孤軋靡依薄矣悵然悵然望昌平  
咫尺乃阻瞻對積有愚悃旣已面致長君茂才又復  
載之紙奉翰諭已領畧矣考後世事當復翻異念翁  
具六翮無言黃鵠不高搏也

答王石谷給諫書

不奉光儀十易伏臘瞻憶何如頃緣 國家講武秦  
人乘時徵奮者蓋數人乃獨不逮公世固有知公賢  
者顧猶泥于舊例以爲破調駭衆執事之臣縮手而  
不敢舉徒且慨噫之爾自何許兩翁入內與談及者  
並往往稱惜然無柰執事者何僕所眷眷于公者尤

萬恒情顧么麼之子充在下陳卽力前爲鼓說無能  
爲公銖兩重漢廷狗監空號知己此湘潭放士不免  
悲吟也僕自信他日不能効時委用思早自解歸乃  
牢被樊籠不得脫側望西雲時時悵惘頃將上謁固  
圖請告苟幸如願當共結廬太乙山也往奉翰示軫  
念可知附此謝私

槐野先生存笥稿卷之二十二

槐野先生存笥稿卷之二十三

左輔王維楨著 館甥渭上南師仲編

書三十三首

答趙劔門侍御書

與趙景仁兵備書

與張南溪侍郎書

答張元洲太守書

答鮑思菴巡撫書

答姚惟貞侍御書

與王兩洲太宰書



答李直夫主事書

答孫用脩侍御書

答何太華總督書

答喬三石大叅書

與高平令衛子書

答趙劔門侍御書

答薛方山憲副書

與王三渠少宗伯書

駁喬三石論文書

與賈樵村巡撫書

與白伯倫論碑文書

答尹朔野太守書

奉王麓泉先生書

答閻右泉祭酒書

答潞安張太守書

答閔水東提學書

與張元洲太守書

與艾西麓巡撫書

答劉亦齋大叅書

與張秋渠少叅書

與光祿谿田馬公書

與尚書西陂劉公書

與中丞平田管公書

與張太微比部書

與胡蒙谿少鄉書

與管龍渚侍御書

書

答趙劔門侍御書

今公此疏皆處人骨肉之間定人危疑之事既又究  
覈既本諭所尊以恤孤寡責所親以息釁端詞雖温

厚然大義嚴切矣漢儒言治大獄須用有經術人則  
公其是哉仰之歎之滇南越在萬里部使者所憑以  
感悟宸聰申達幽隱者獨咫尺書耳言能中窾見  
能先幾斯折萌消患方隅所賴以寧戢也楨雖典在  
文史時搜覽四方章疏苟當于理輒爲擊節誠念人  
才之難也彼方廉正直豈不謂賢然苦節自檢者皆  
能及之至辨捷裁斷非天畀授未可勉而能也自食  
大庾粟十有七歲茂能取尺寸之功展米鹽之効今  
春考察分必斥放乃顧復留齒髮逾邁向往日頽坐  
憶時髣面熱汗下至淫淫沾几席矣公軫念同袍訊

及夢蘭此夢不易得猶復箠箠一丈夫也柰何柰何  
人生進不豎勲名退不謀宗祧兩者咸失之尚得謂  
士哉無何卽抗疏休矣獨患乎弗能遂也

與趙景仁兵備書

叅將趙白樓者故鎮保州時曾與識面今十七年所  
矣中間興仆仆興不啻三五乃茲復興與公協理戎  
事其大槩可睹已爲人多算且便捷了達時中機宜  
而公披瀝奉職不縮不僞兩君爲一各用所能于事  
必有濟也僕有二癖恒自苦之又不幸不得朝夕觀  
磨柰何幼志好高沾沾自喜猶之宋人寶燕石遇周

客而不肯下也有自是之癖念作輒往命駕所如每至塗窮有率意之癖明明自知之竟不能力抑按也望廣川不遠南風便幸惠報音且作藥石

與張南溪侍郎書

去歲奉翰教及腆儀侵尋到秋忽有虜患諸臣咸共憂之楨也食大庾粟獨能晏然坐視遂廢一切往來報謝因之久稽開春復值考察分當斥逐結束埃珉旣乃復留始理人事於是解裝檢翁寄示二俊之文讀之遵來命謬施點竄又以通家故不得徒爲蔗言以甘聽取悅也舉業文章名家非少而翁之作稱鵠

謂其中立而學者可赴也今賢子若孫讀架上書聞  
秘密訣自當肖似乃猶尚弗逮者則習之未究也令  
郎溫潤而有沈痛之思令孫俊拔而多奇崛之識總  
之皆千里步也各極所長去所短一變至道即可探  
取祖翁故物矣今時舉業濟渡桴楫耳登岸則舍之  
苟足獻吾身未須猾猾苦索之楨嘗竊慨農東未以  
利耕士執業以効用乃今所業者與効用者異故士  
或半世弗售半世以前精力殫于是執卒之成敝帚  
也人恒歎曰乏才乏才夫以四海之廣乾坤之精所  
生何嘗無奇直所學誤之也且無論賢聖事卽蘇秦

少時便讀陰符工研揣摩之術久之精曉曰持是可  
以說諸國矣一說而六國景從金印纍佩後世推以  
爲鼓頰之宗歎不能及假令有若慕秦者自少習之  
浸淫十許年亦未必弗秦若也古人書劍兵法風角  
卜筮九九諸數率自童豎學之以故用之輒驗况匡  
國理民其道又鉅此乎苟欲蒐羅茂異盡一世之英  
宜于科舉之外依倣漢唐舊制更設數科則淵珠不  
留群材畢會治世之大機也顧令甲一定莫敢增埤  
積云云者直歎之耳往叨校武之役錄成初擬寓致  
尋復蹉跎今併上之幸無坐怠弛也春來台動意必



休嘉附此以候

答張元洲太守書

凡公歷兩郡咸有異稱今領大名益復藉藉此非可  
緣飾炫鬻得也十七年來一時同升之雋浮沈流散  
不可勝原而齒髮更變或少得壯或壯得老間一相  
見驚目握手有餘悽矣人言公當以考最來也審爾  
我固使使候之又恐相見感歲轉益惻惻也僕今四  
十五春秋矣人生而逮斯景猶之注坂之駿脫轂之  
矢望衰暮斯須耳夕日易下覆水難收我壽幾何而  
尺寸未豎每念一至汗未嘗不浹流接踵也今春考

察私已倚馬待玦乃顧不遣且冀幸與公晤問所去  
留士人奉軀充位莫有表見卽太倉鼯鼠耳我今誠  
似之以故眷眷舊鄉避賢者路也齋書使者還取報  
卒卒附言并謝芳訊須面更布之

答鮑思菴巡撫書

頃從他家得翁留兵疏草讀之其志忠其義正其詞  
痛切而不涉峭崿可以上悟 人主下愜士論言事  
之體正爾若此枝詞藻幅祇能飾觀聽于事安裨哉  
比議下本兵果如請得留兵五枝不遣由今西北一  
面恃以無恐卽其兵不能力闔然爲容好示威則有

餘矣宣大新開馬市國人可者半不可者半于高明  
謂何古人謀國遠者千萬年計次者百年計又次數  
十年計目前應卒不可言計避難道責冀以身免而  
不顧其他者也 主上注念邊畧思埽胡塵置疆場  
于萬年之固至惓惓也其誰爲圖此計乎僕以翁曠  
覽深謀赤衷體國必嘗設筭于懷幸先以示相知乃  
後謂聞于 上可也佇俟佇俟使來辱翰教附謝不  
盡

答姚惟貞侍御書

今關中諸事以公矯矯之風漸就緒理茂可慮者獨

亭障空虛或啟戎心是不能不軫胸臆耳寧夏被創之甚客自秦中至者頗能言之惟在論列中者淆亂其說以熒惑君子之聰則自計脫畀故與公爲犄角兩家並訟是非竟各有歸其慎慮之可也方今宣大開市與虜酋易馬後事難量今將柰何諸處徵調之兵本以赴急久而不散或唱思歸之引且天時恒暘自黃河以北太行以東赤地彌望木皮草根剝掘殆盡塞上修戎而內地乃荒恐有持白挺乘昏暮爲村市患者目前萬事俱可流涕所幸 主上明聖加意制胡之畧一禱不雨至再至三必沾濡乃已卽周宣

之選徒振旅成湯之露處桑林何以過焉使在事諸  
臣協心戮力仰奉九重之慮則羯胡不足畏而旱  
熯不足憂也推筆逮此爲之慨然鄙人徒耗倉粟坐  
觀時政不能効毛髮之力華嶽巖洞可藏吾身日夕  
翹首悵悵悵

與王兩洲太宰書

頃吾師大廓先生至一見揖而訊翁因悉山中歲月  
非人間世土人樂之往往自忘其年倦客還而卜之  
亦可栖形定性完精而益筭也世事風雲倏忽幾變  
舍筏登岸掉視中流乃知濟渡之險艱矣故翁居山

中一丘一壑則萬金不移通侯不換也今年七月當  
翁七十之辰吾師軫桓山四鳥之情語楨曰羈而不  
得觴柰何因以詞屬令申所爲壽者楨受簡不敢讓  
比詞又不敢夸詡緣飾以厚誣長者今在篇者咸說  
實道有不溢一語卽文謝藏山而義取從繩無論史  
家備采擇且令實錄入家乘也翁家兄弟並繫當世  
之望居者宜止仕者宜通敵稱籍甚于搢紳間非楨  
一人之私口也而吾師感今耳目所接復戀南枝楨  
以旣挂網羅誰能解去固須搏風振翮圖萬里也楨  
關西鄙生自十年來被蒙渥愛逾于骨肉令噐光祿

卷二十三  
君歸附具一幣爲壽物不逮意臨發依依

答李直夫主事書

書至始知使車駐代蓋歷偏關度太原而跋涉至此路經數千月破六回可謂遠且苦矣入臣勞王事有若此者鮮哉方今虜衆以候開馬市爲名四呼部落集甲塞上密如雲屯結若蜂攢其意欲如何不卜而知不問而得也所徵諸鎮兵在塞上者號稱健兒能與羯奴示一創乎不也居中任事之臣念天子憂胡未滅於凡饋食厲卒之術籌之旣精施之亦詳且備矣而星書一至猶不免動勦者何也卒能食不能

戰食雖饋不能飽也茲計所以飽宜何如而可夫古  
爲壯士俠客擊牛釃酒吹笙竽舞長袖乃肯借軀報  
讐爲國敵愾今一飯不厭腹固然亦其人顧私愛命  
蔑忠憤之氣又將帥之教不先而軍興之法不申也  
僕守在詞曹論四六校黻律自其本事顧念往歲四  
郊多壘農夫輟耜工女下機商旅不行吾安事筆硯  
間哉以故數從客談戎務究所爲破強胡而扞國患  
者言者紛如卒未効實惟公以餉事親行塞上彼夷  
之情我軍之狀熟悉之矣其教我毋諱可也

答孫用脩侍御書



使來奉翰劄獲悉使事勤苦殊費心力比他省不同且以見南北民俗猶夫氣候以治北之術治南是挈狐裘而市之楚也今公得所以治矣邇者從謀臣議旣開馬市虜酋旋復入寇疏言胡騎在塞下者號四十萬計將大入至驕暴矣初謂市馬可羈縻反乃示怯招寇由是觀之務實者先自勝飾虛者祇自誣耳今年胡騎早集先昨歲一月而數復倍之邊臣告急都民懲旣往之創荒荒怖悸易以搖動私量我兵猶謝昔時斬將奪旗之雄鄙人之危衷恐懷卽如駕海觀濤升木被風顧未有一竒能舒目前之急愧且欲

走未可也讀公條十二事種種中患越在萬里心乃  
縣于闕下古所謂純臣非邪歎之賀之待防秋期  
逝諸鎮咸寧更圖書報以明忻慰之私

答何太華總督書

茲讀公疏分布兵馬拒守險塞相地要緩爲兵疏密  
筭數旣精條具又晰他卽百輩不能得此一也至謂  
增調民兵防衛 陵寢益見重本慮大之意言旣中  
竅自宜聽發今內地諸司懾于 聖諭之嚴凡可弭  
患批難者輒投足下爲之無慮有謀復未遂也且虜  
酋旣與開馬市矣抱帛牽馬曾未旋踵卽殺掠恩信

難結羈縻之說竟非可恃獨修戎壘練武士乃我長  
計亦我本業以公之肝膽自足感奮諸將以公之威  
令自足鞭驅三軍頃來邊奏匿端內地莫弗知見所  
言曲折群指而笑之部將有襲是計來獻者勿聽楨  
觀今日虜執驕于往歲若更大侵虜螫不已必有念  
宗社痛人民一臣者出尋究驕端伏廷請舉此所謂  
後災也惟先見早圖者免焉使言公身歷崖谷食宿  
于草露之間甚勞苦矣今諸司苦患胡皆曰幸何老  
守北門無恐故公思欲上寬主憂下答士望誠不  
得不汲汲也有病于此經醫十數皆無功主人不問

扁鵲至主人曰幸君以一劑謂扁鵲能生死人也今士大夫所注望公者頗類乎此前時一二浮言猶之朝煙霧靄倏忽流散身爲大車必受重載妬口無有拭目者多也數承翰劄稽而未報詎有他腸意必亮察大抵位重則樂言不前甘言熏耳惟留意詳覽鄙說更觀後事所至則楨乃何氏之忠黨也

### 答喬三石大參書

往接嘉翰登腴貽乃使歸殊遽不肯少須取報今其使再返始附書謝焉諒不坐爲怠也公鴻才通方不可以一隅名卽自引謝不能于戎事而世固予之矣

且所謂治戎旅者豈必勁捷若虜善騎射角膂力哉  
識機達變篤中不欺視公家如私乃稱將萬人統三  
軍者也比歲講武一時驍雄蹈厲之士蒐羅碁置然  
兵不稱壯何也篤中不欺視公家如私者鮮也公于  
斯兩者咸有之故僕推謂可恃以能振積弱排紛難  
者此也方今馬市旣開虜酋旋復入寇則盟誓不可  
恃恩信未足結獨有戰耳而戰又難卒以語百策皆  
收而一效未覩謀傳虜騎屯塞下殆四十萬朝夕且  
入將柰之何此之爲憂知公固同之也使言公或以  
賀萬壽來也果爾則侍對有期矣東望海雲可勝

延佇

與高平令衛子書

客自晉中來者頗稱高平之政崇慈悲務寬大煦煦  
然有古豈弟君子之遺余甚嘉之顧獨念近世人情  
竒黠狡巧故治隨之變至弘治正德相接人情尚未  
甚澆故政宜敦大迨于今越五六十歲矣天道三年  
一小變三十年一大變則人情推移可知也故體貌  
之遇士夫恩惠之結善類刑威之待邪慝斯三者從  
古以來善治者莫之能易也若一槩量物不別等級  
不辨良惡則吉人墮體而兇夫掉臂積久而名敗卽

能改服振嚴百姓弗憚何者習故也世亦有主嚴治者而君子又非之放意淫刑不當其辜小過而大懲甲怒而移之乙也詩云魚網之設鴻則離之刺辜不當也張衡治河間下車密先收捕大猾郡中豪俠皆逃去他境盜賊止息大體立而先嚴著也故苟當其辜荆朴不犯非我所致卽斧鑕日事誰其懲焉吾子英年茂才于一邑何有第政體民情猶須裁察斯措置不謬而張弛中窳古人有言不剛不柔敷政優優以子通于詩故數舉其詞告之毋謂余持文墨者言何迂也泉南郭君獨稱子不輟口與余得之他喙者

殊異郭君忠厚如此待子更調頌轂達于京師當復  
爲言以賀

答趙劔門侍御書

沅江之役撫臣不惟始卒不筭勝負莽莽焉趨之至  
令方伯徐子及于難此法所謂無筭而輕動者也且  
徐子身爲左轄未有咫尺之書相命戎馬之務素非  
所諳威轂未洽于蠻土而才畧不逾乎中人獨何所  
負而投軀湯火也今公疏中區別二子情臯犁然如  
丹石子卽百口不能解令徐子有知當作鬼語自怨  
悔也往僕致言于公以爲熟計所爲撫者誠慮其急



之變生攻之增毒也乃今果若此矣且夷種劫殺相  
傾滅倫奪柄固其恒事自 祖宗來苟值有臯必問  
詞服卽置不深文苛責焉非縱之也謂夷狄禽獸其  
類一也育禽獸者牢籠之而已能馴之必不逸乎逆  
酋那鑑刃兄妻嫂無道之極不可肆赦此以中國之  
治治夷狄紀綱一統不宜二理旣彼稱名兄死以蕩  
舟失水亦其怵于臯罰匿情遁譴卽因其詞稍責之  
令 國家無赦過之典西南省瘴厲之師此謂治以  
夷狄而包以天地計之上也乃不戒微火拖薪自焚  
未睹其情輒入我師繫頸不得而反刃先著其身則

鑑乃負固方命堯舜之世必不肯貸雲南遐在萬里  
四面環夷創鑑不痛莫以示餘矧寬之乎石子不聽  
公計徐子不告而往其失皆業不救今欲治之何出  
幸審圖詳計毋蹈前悔京師搢紳之屬得讀公疏者  
咸籍籍稱云欲平沅江賊釋趙監察不可慮瓜期且  
逮又爲之嗟僕以公憤不任事最甚卽一日不代固  
必銳身効命竟不遺難于來嗣也徐子幸得卹典  
朝廷憫其死亦以勵諸臣之忠若援漢事證之甘陳  
策勳絕域議者猶以生事啟釁不錄其功徐子坐狂  
瞽送死至勤 國家不可得已之師貽 君父萬里

存  
卷三  
之憂稽彼較此則徐子者雖攝魂受譴可也

答薛方山憲副書

邵君以公書來且道眷眷之情則公之于僕可謂厚幸矣古人有言人之相知所貴知心僕秦人也秦地廣川峻嶺山形見三百里河流之音歷聞十舍故士生其間茂幽賤之行亦無大蓄之才若僕淺中狹氣寔稟土性然與俗戾甚矣乃公奮格衆之見謂僕可朝夕就乃卜鄰凡所與論咸當實不華抒憤申鬱有忼慨之節焉僕因竊歎公具人也而負秦性故今垂絕恒存記憶誠有所符契非私而已也僕不到吳中

聞之山多奇峰水亦環曲晴晦殊狀而光景易觀故  
東南之勝區而秀俊之深窟也乃其地顧復產薛公  
豈非異哉今世人才亮直誠慤者十人而一聰明洞  
徹者十人而九故一人飾僞九人睹之一不能誣九  
故僞者竟敗一人執實九人睹之九不能勝一故實  
者輒彰有人于此於凡世俗之好靡一弗重乃復匿  
端竄跡示若未有庸詎知前有顧者背有指者旁有  
議者四面受攻百藏畢見此僕所爲抵掌而笑頓足  
而恨者也取以較公何啻人鬼之別庸鼠之不同哉  
自僕交游東吳之士不可勝記獨以公爲難能謂其

直露本真無假緣飾吳中未有两也夫玉無完粹帛  
無完采故瑕不能毀玉之名類不能減帛之色直士  
而務幽勝負全節者恒必敗有偽飾也若公所持令  
積而至百年何敗乎邵君稱公獎予我者率非吾所  
有僕莽莽鄙朴人也邊隅用兵自惟愚孱不能進而  
統偏師之任効一割之用至語本業則守在詞曹大  
之不能論當代之故次之不能成一家之言謝濫竽  
之譏誠若昔人所謂仰慙玄冕俛愧朱紱者矣以公  
既知我不嫌暴短他人聞之將謂懦哉秦人何驚也  
邵君温温退讓有古太伯之遺教焉乃其師復有秦

風何也神龍芝草隨地而出非方隅能拘今公亦云  
流傳巡試諸郡所過士有服詞越人卽善黠化人不  
能少加于公也雖然固須加意所未具者則邵君有  
口往許贈言卒之不負然諾茲冗冗未能也

與王三渠少宗伯書

自郊關別來奄歷三序懷戀高誼固所謂神往形留  
者也乃後得翁途中二札而以札至者又致翁口教  
最悉哀苦慨衷又復跋涉乃猶眷眷不殺若此卽骨  
肉何加焉顧損揆分量能不能副所期冀世未有赤  
子抗鼎怯夫探珠者也獨懼虛名爲累側目者衆私

心惴惴猶之駕風舟涉大洋將未知抵泊所矣聞翁  
歸居服舍料理壙事而楨之先人寄藏他土不得改  
封一快志焉翹首西雲淚淫淫下矣老母怵于昨秋  
之警見秋甚思家楨日夜喋喋慰之人生進退觸藩  
有願皆違何以言仕宦樂也日下防秋之兵四集虜  
諜者知之雖稱月滿南侵徒虛聲恐喝耳第虜其兵  
鮮而忽縱也何許二老調度焦勞至廢眠食趙景仁  
亦將兵四千人協守薊遼矣東北一面秦人碁布星  
聯此楨所謂無事者也冬來果竟無寇中外休息將  
士枕戈而卧學士大夫蔑鞅掌之憂則楨計且承間

以狀謁歸積有夙抱種種不可解安能鬱鬱久爲客也

駁喬三石論文書

鄙人所撰述竊自知陋以視他人率皆面謾故以投公誠謂能指迷發昧令不乖所適也乃今所稱予我者一非我所有不副本初就正之意與他諸面謾者未之或殊卽公自以爲業已命之然不能令僕信也何也今海內翰卿墨士彬彬然興矣其擬則史遷之作者不可勝數往往藉格襲詞猶之畫臨粉本書摹法帖求一毛之似幸半體之同以爲竒絕固未有蛻



奔陳骸自標形神者也。劄稱僕云第取其指不襲其跡。此神化之道。僕安能及之。而謾以相加也。文章之體有二序。事議論各不相淆。益人人能言矣。然此乃宋人創爲之。宋真德秀讀古人之文。自列所見。岐爲二途。夫文體區別。古誠有之。然固有不可岐而別者。如老子、伯夷、屈原、管仲、公孫弘、鄭莊等傳。及儒林傳等序。此皆旣述其事。又發其義。觀詞之辨者。以爲議論可也。觀實之具者。以爲序事可也。變化離合。不可名物。龍騰虎躍。不可韁鎖。文而至此。卽遷史不皆其然。乃公亦取之。加僕何言之易也。晉人劉勰論文備

矣條中有鎔裁者正謂此耳夫金錫不和不成器事  
詞不會不成文其致一也文之不易言也若是僕安  
能及之日來誦覽大撰數篇總之整雅宛密厥初管  
構布置費心力矣因取遷史較之則遷乃疎鹵矯健  
門塗雖殊而要妙均也自僕繹思遷史累年禩矣然  
或由本以之末或操末以續顛或繁條而約言或一  
傳而數事或從中發或自傍入意到筆隨思餘語止  
凡若此類不可毛舉竟不得其要領乃今觀公之撰  
如此則作者自命可也何必古同哉且公少時卽好  
習古文詞到今猶辭云未能也而僕習之又最晚重

以性資學識並謝上才豈克有造哉嗟乎已矣初計  
出城得乘間一語比山游復以賞眺妨焉然中曲念  
之幸承劄諭聊此布復自游歸便爾多俗不能更往  
爲別倘軫教懷無悵嗣音

與賈樵村巡撫書

關中人望翁履都撫之任始能槩被休澤如渴者思  
飲寐者問旦乃今果諧所願知翁卽有以答之也今  
外服諸司各攝一職唯撫臺總統焉固須完德兼才  
不規近小乃可服衆志豎大猷也乃翁方嚴敦大種  
種有之視聽通于千里之外而圖畫每逮乎百年之

遠自損所交游賭記誠未有比踪者也初關中設撫臺也 天子念此邦遼廓蕪之戎務殷殷每以內臺左右郡御史遞往其時體重其後頗存之頃歲以來臺公務謙約卑減駟從下同諸司此優于振務者然非所以別等威也禎以爲昔之人有食一肉脫粟之飯與一介之使自隨者是皆察于小物未達乎大人之觀也大臣擁節保釐人民隸境內者果以我之故安堵不擾盜賊止息水旱亡憂此其福澤廣厚矣卽令以千戶食我百隊從我可也聖人之教先廣大而後精微孟夫子不嫌後車之盛傳食諸侯彼其中固

自以爲當也秦人戴翁將各獻美芹扶車轂以報盛德卽翁欲自卑減不可得以凡事必正體貌而後功緒成故楨于此僭論之唯留神聽覽不加之臯幸甚幸甚

與白伯倫論碑文書

使者守碑文頗久乃今始與遣歸却自愧其不文也吳太史狀編年踪跡可尋而足下手錄行實又廣紀殫述總之皆史筆也顧僕之見以爲尊甫先生負才卓犖乃竟顛頽至卒究所肖似則賈太傅蘓長公其類也碑當論其世明其志令後世觀者知白公不伸

以此故耳故僕之文則表尊甫先生好詞尚友有敵  
搢紳間因之招忌賈詢所如輒不利此可以慰逝魂  
信來觀矣雖語非茂古然而非誕也孝子揚親之念  
安有窮已有咫尺之善卽求爲著之狀所錄種種者  
是也而僕以爲人之行猶人之面也人各一面士各  
一行故依形而寫者其神真因事而書者其德著泛  
引龐雜不辨本實如之加塗于面人誰何之哉今文  
采狀不能十之三四非敢疎畧坐所見若此耳篇中  
不具生卒歲日與子孫婚嫁諸等者文成而諦視之  
未有入處宜別勒之下方中間若更欲裒益以快追

稱之志無妨自剗削也南望江天不能羽翼去伸執  
紼之悰如何如何

答尹朔野太守書

今秋虜酋不敢窺關南者非以他故實坐防秋之兵  
徵發四集虜諜者覘知之乃爾不入憂國之士幸其  
暫寧而謀所善後論者紛如卒落陳常千人之見一  
軌未有窮探極筭息衆咻定一是者也茲覽公備虜  
事宜三策四議云者咸因事順時行之可及用之輒  
效固所謂智士之長圖忠臣之却顧也方今有司疏  
請蒐羅群策尋百世之計苟令不奪浮言持是以往

雖界瀚海城高闕可也僕以豪傑立事有二道委任之專也國論之符也兩者缺一不可就毫毛之勳聽信廣博則士各自疑國人互不相下則才臣弗奮遠追往事近證君侯誠可太息柰何柰何奉翰諭乍有拂衣之思斯甚舛矣鄰人失火尚不愛體髮奔迫救之况國事乎寶劔在匣終非長物神龍蟠泥若興雲雨則須也幸公恐抑嫉時竟抒夙昔之憤目前是非短長勿與之爭且鷲鳥將擊必匿其影獨柰豪傑不然乎言不盡懷然大指具矣惟省度顧慮庶慰知己

悵悵



奉王麓泉先生書

自聞翁以憂歸旣歷兩歲坐風毛未順數欲申訊不可得然中懷耿耿矣私計今冬當從吉服而士論倚翁當一面之任紆目前之急固時時指較月日須其至也旣禫卽宜卜期就道執事君子方手挈節鉞左右顧莫有當者翁竟能辭哉頃來胡虜之患自正統以還此爲再睹而正統時有余司馬石將軍二人者銳身却敵有死無二虜三折北去以故疆場無事享及百年之安而胡運有盛有衰今會其盛時而余司馬石將軍二人者又不可呼而起於是憂憤之士有

俯仰之悲矣。楨觸目激中不可抑忍，輒爲門下道之。則古所謂流涕太息者，誠有所感痛非迂而已也。便申夙昔，併補賻忱。幸亮在不舉，楨疎鹵，謏劣視往，滋甚。明春當必侍于京館，鄙生之腹腸，或有浣洗時也。

答闔右泉祭酒書

使者未至之十日已有朝旨，乃今見使者，僕誠有愴然之懷焉。且公受檄旣逾一歲而不之官，卽苦疾病困，亦須力爲咫尺之書抵相知者，令達當塗白所，以留滯鄉園之故。又請所爲京考自陳便宜安在如此，卽無今日可也。乃慮不逮此內地諸人，借聽于流

傳之口輕信妄卜或以爲病或以爲坐有所覲波瀾  
喧口因以啟衆疑而觸公論此諫臣之疏所由也疏  
但駁公違簡書之程不及時自陳未始一語相濺  
則平生之槩可知矣顧獨不能爲君子諱昭昭之失  
此其中誠自致之未可嫁尤于別氏也自僕交游海  
內之士不可勝數然獨以公爲難能固謂其方蘆堅  
直蟬脫于塵壒之外皜然而不汗嶷然而不可下也  
異日紀綱風俗竟必賴之乃惟一意直行少回却之  
顧其蹈危機何疑哉豪傑立事斯際最難大體旣豎  
而委折亦未可畧夫黃河豈不稱雄流哉九曲而遠

之海也君子之居世亦若是而已今公歸棲涂水之上然士論竟不忍釋羽毛若具無言鴻鵠不扶擣也僕天性愚戇甚不諧于時俗稅駕何所私切憂惑有頃且投劾去矣聊以俟間伺便耳使回附言申復總之披寫胸臆殊缺宛順恃惠子之知我耳

答潞安張太守書

張令以徵至獲奉翰貽故人之念惓惓若此上黨紬產也自昔有司爲患苦不獨在今凡郡稱沃土出奇貨者皆其地之殃故秦之鞮具之紵蜀扇閩絲楚葛越羅咸以殃民而病國今公念工不下機不給其求

良苦哉良苦哉他以私請尚得辭却至如馬市所須豈能短缺稽滯之哉雅知公惜費恤下今且柰何亦惟就所不得已之中少加之意而已頃見東野君云公有避囂之圖此甚不可者也方今進退俱制在人主冒昧投一疏懼有他虞幸審裁勿謂過計

答閔水東提學書

往龍泉梁君自京而返晉也其時屬倥傯不得具咫尺之牘乃因梁君致懷音諒梁君有口得徹之也晉大夫游京師者稱說君侯爲人師表有軌度可尋諸生翕然從之彼苛求備責岸然自尊大令諸生視之

若鬼神冥冥莫測其所向何以作士類指迷塗也君  
侯居詞林十年與我曹共脉脉守祿乃今一出而遂  
振聲名若此假令沈滯到今則猶復脉脉也能有表  
見哉故古鏡不磨誰睹其光洪鐘既叩乃知其音斯  
兩者可以喻君侯今昔之故矣鄙人念詞林舊事皆  
老死筆硯間自度卽老死無能成一家語欲脫棄改  
圖顧方今講備虜之策唯戎馬是尚而我材甚孱愚  
不能任荷爰之役統偏師之權事兩持而靡主腸一  
日而頻迴與故人道故直披情愫也且人生得爲男  
子又得爲官人苟足立功勳無論何所柰何較外內

輕重哉詞林諸同年漸見序遷終不離筆硯君侯所  
建堅固衆人歆艷者哉使來奉翰劄益信在事勤苦  
乃猶不忘宿昔千里遣訊情誼至篤厚矣感謝彌襟  
書不盡意

與張元洲太守書

行子道經邯鄲問趙王故叢臺則莽莽一土墟矣道  
傍有呂公祠乃盧生枕上功名所也併此兩感以爲  
士人榮途相競亦何如趙王卽百年利達猶屬短夢  
則澹然有縣車之志焉至聞君侯提兵守大名壤地  
千餘里平野如案大城小城悉晏然安堵未始有匹

夫號呼于草澤者此其于功名甚熒燁顯盛矣乃輒復歆艷慕重之則謂天地間何者非夢不有往古安得來今士人固須乘時効績不宜作玄虛歎也斯志冀邁一識道者語之以紓旅懷乃世途錯迕車馬多背馳而君侯又越在大名末由展敘在叢臺館中問大名遠近驛丞云距百里許夫百里非遠僕坐扶侍慈輿不能往也乃具言令驛丞達之君侯其以余言爲何如哉

與艾西麓巡撫書

鄙人道經東垣而公所遇鄙人者居多破格之儀非



望之節在昔故人相值或至解袍贈車乃今所遇復過之矣竊自循省萬莫一可當也愧甚愧甚鄙人濫厠仕籍十有八禩所嘗交游海內之士不可勝數然竒瑰非常之才無幾也鄙人與公雖稱共土之私同升之雅至本所以敬禮歆艷公者不直坐此故也蓋殊有公家之念焉方今天下誠號治平然虜騎往往有侵軼之患士大夫習于久安務于細謹至今批難解紛拊士卒靖邊疆十人在列九人鼠首堪歎哉堪歎哉私嘗指數心較獨公足以當之無歎故自仗鉞以來薦歷二朞而威聲所暨規畫所施蓋人人頌之

矣士有負宗社寄卽宜爲宗社重之矧公又屬共士  
之私同升之雅哉在公省中夜語奚啻萬言咸指擢  
賢腸不惜忌諱公吾白頭之知己也當必存記不斥  
爲謾也俗士好妬其遠攬者又欲羈致宇宙之英收  
爲已有高標特立士人美節至于濟事就功非此輩  
能與也且公獨不見饗子乎調五味至和美矣當筵  
入唇而上客無賞音主人將以爲不善味也饗子能  
復白乎事故有類是而患甚于饗子者不可弗之計  
也公守貞有素羞作世俗中人非智有弗逮誠志不  
肯卑也若欲濟事就功則固須調滋味快客吻令無

戚促焉可也。面言既悉，又此喋喋爲故人完璧計，卽過誕何歎哉！今次邯鄲護行者，皆選卒卒，搥筆布悃，南去。將兼程期及清明候，掃先隴草萊也。

答劉亦齋大參書

由漢中抵華下，可千里。所乃公不遠千里道，使使齎書加幣來訊鄙人。鄙人誠竊愧之。頃公之臨華與鄙人晤也，蓋在斯須之間。乃今所遺顧甚于夙昔之好。百年之盟者，此何以故也？古之豪傑相見，則脫龜解珮，遠相臆，則折梅贈魚。彼固謂遭遘之難也。鄙人誠碌碌，卽令與公三日語，不能一言奇而中矧斯須之

間哉故對使者有汗容非虛託也公歸漢中嬰情鄙人此其中固有謂獨自揣無有耳客有好游者歷覽名山大川盡矣至一石之怪一溪之愚猶必記之曰吾以志吾好也夫交道亦有類乎此者固不必結歡皆雋茂問貽皆異等也使還附謝朓所承賦不任之意若此因憶漢中有淮陰拜將臺今巋然存焉當其時才者輒上靡積薪之嗟以公之賢勤苦又二十年餘矣尚猶守在徽垣滯于一隅由是觀之則鄴侯推轂之公信非後世所能望也書成忽漫及之

與張秋渠少叅書

華下山亭之會得公嘉篇紀之足矣乃固要鄙人言者何也富人已飽梁肉乃復甘薇覓貴所鮮耳斯其意毋相類乎鄙人謝不獲今倚而和之詞格誠下然直吐肺肝矣先人阡距會所僅二里許僕度竟老不能補公家萬分之一不如解官歸卽故阡營半畝之宮理松楸安愚拙方今才彥塞宇內豈缺予一人何以妨賢路爲哉篇中語皆真非有謾也往與槐謝公入關而次華陰雨中望嶽貽詩見懷僕旋和答之今并前詩登一紙寄請斤削幸毋弃擲徒美言相市也領有二扇滯而不書還公以爲怠乎殆非也今二扇

仍書前二詩已踰夏入秋矣乃始還報者謂書之不足充公掌握且辱懷袖抵于今節候漸涼二扇將捐置篋笥中不欲暴醜故伺時與之耳造物者若爲鄙人護所短明年毋令祝融秉權可也

與光祿谿田馬公書

不奉光儀蓋十有五年矣然念未嘗不之也在京師時客自關中來者輒道翁之精神完粹筋力強固殊不類高年人楨甚喜以爲邦有老成後生之典刑在焉乃今歸華下望三原百里所不能撥冗往見則悵悵有違欲之恨矣仙居人大司寇應公云與翁至深

不  
合  
利  
三  
三  
一  
楨臨發以書來屬令致之今附使往夫友朋之義歷  
四十年如一日若應公者非流俗中人也三石齋子  
爲楨言三原連兩令不知禮其境內長者則宣聖伐  
木之事信有之矣楨因歎關中自有武功鄠縣高陵  
三原數老以來海內之士翕然景嚮見者傾悅未見  
者景慕此其盛時也乃後武功高陵修文地下鄠縣  
老而喪明獨翁壽且康寧然不能免乳犬吠豈氣數  
盛衰使然哉楨每念諸鄉先生思一追躡前蹤然望  
塵不及輒復輟步又以數值其衰非鄙生一人獨興  
能振之也頃來世務益紛拏若大江風濤斯須殊狀

乘軒非樂岩居非戚也楨自顧驚下竟無裨補故往往有引躬之志獨無奈何不敢陳也亦伺間便歸耳若翁別有教指將改圖聽之至望至望

與尚書西陂劉公書

頃從州中吏得接鼎翰華軸與腆儀俱至楨登受恐愧汗流及踵自抵家來日坐塵溷思欲修訊者凡幾竟以他奪乃茲顧勤軫念若此此所爲恐所爲愧也軸中詞居多假借一非鄙生所當其云金鼎調羹卽且屬之三渠先生先生雅量有容兼四海之外以爲膜固宰相噐也鄙生楨植性愚戇不能忍不平之事



淺中狹度有觸便發竟安能若所望哉今天下漸多  
故矣而戎馬之務最殷密勿之所圖畫與諸司之所  
經營率皆是力然道傍之謀淆言惑聽中制之權績  
効不卒今任事之臣視解印綬快如脫淖以此乃知  
翁退棲岩林偃仰自如乃鬼神之陰庇人世之完福  
也人言公年已七十矣而精力彊固骨神秀健卽少  
壯弗逮謂天欲倚而致太平故然楨以爲非也本之  
去累釋負乃能頤葆若此假令今日尚羈有位則憂  
危勞瘁將不知作何狀老嚴之論在定神守一蓋言  
退靜也世不能忘我而我乃忘世此老嚴所以長生

久視而不滅也翁叢稱著在宇宙久矣又位躋八座  
壽登七袞丈夫福祿兼隆如此亦極矣安卧而逾百  
年理可卜也翁之才誠足戡定阨難抒公家之急顧  
時未可耳翁洞窺宦機一去不掉頭士論高之故植  
數申之爲賀焉目前所睹記彼其人求爲漁樵而不  
可得也可畏哉可畏哉植南圖在秋仲其淹吾土不  
卽發者憚煩暑耳使來具儀將謝且請後至之臯竛  
抵南中更修所爲報焉

與中丞平田管公書

自歸里中日坐塵涸幾欲修訊而卒未能乃茲顧勤

長者軫念貽音惠問楨手書愧悚汗下交頤謂不往  
反勞先之也關中修詞之士自近世所睹記不爲少  
矣厥製皆稱雋矣至其行履矚然拔跡于洿塗之中  
諸學士大夫蓋未嘗不推轂翁也乃茲所爲詩又閒  
雅冲幽若此豈孔子所謂有德必有言邪楨讀賜至  
集三復矣他家皆臨帖字模粉畫耳獨翁自吐胸臆  
披寫情性所不能離者古人體裁耳以傳久遠睹者  
自有定議誰能私之乎楨濫竽詞曹久矣卒未有窺  
然顧樂稱作者之美竢抵南中更欲綴一言于卷末  
明修詞之道貴精不貴多其詞傳世以人不以言也

與張太微比部書

自歸里中口坐塵溷幾圖修訊而卒未能然念未嘗不之長安中也項從長安人得翁朝夕出入甚詳蓋世態物情自昔翟公已然此顏闔所以鑿坯而遁陶潛因之託酒而逃也少年時翁與何許二翁號稱長安三才今二翁崛起震代作社稷臣縉紳之屬咸推轂倚重自引以爲不及獨翁伏在丘園不見所長蓋世無知者耳脫有知者出拔而置之高位畀之重權則所發謀舉事濟時効功豈果居二翁下哉才畧誠埒矣顧天有大數人有大命多少竒偶遂相萬也則

何怨乎僕又以祿位名壽此四者皆人之福天之加厚于物者也天道忌完而貴缺人有一于四者卽足矣今翁有文名世蓋千古之事不朽之業也行年已六十餘矣而捉筆伸紙數千言立賦其健如此卽百歲不啻此翁于四者之中身具二福視凡夫倍矣又能兼祿位有之乎固造物所靳也由華下望長安未二百里甚近顧義不得往未以申夙昔之抱僮來嵩候門下明所爲依依者如此也南圖卜在秋仲向非炎節發去久矣坐此淹吾土耳以翁或欲知附白之

與胡蒙谿少卿書

往從張太谷氏得公集誦之蓋慨然有感于近世之  
作焉古稱作者謂創制立言自明其指也今好古之  
士苟幸徼名往往襲而用之但可稱述難語作者故  
詩有自立俗格竊奪古意者則尸祝之傳告也既擬  
其體復掠其語者則莊生之刼篋也僕觀公詩屢出  
已見半皆昔人未吐之語所謂因境抒情隨體陳致  
以稱作者非邪至徵事幽竒鑄詞秀俊卽古之作者  
不能抗也僕仰高風舊矣顧獨不獲一面以快心焉  
今幸在轡而還關中又望長安不得往玄指正論固  
學步之子所欲聞也阻不相近柰此情何僮來申候

明所爲瞻切者如此無何且發而趨南中旣至更圖  
問訊茲草草未之盡也

與咎龍渚侍御書

久客初還故人近者幸而遠者不遑馳候適方計取  
間爲之乃勞高明軫眷使使持書函幣抵訊敝廬則  
公義不遺舊禮且先施也念往與公比翼俱起而公  
挾有六翮負萬里之圖乃天道幽昧人情嶮巖甚于  
太行遂令塌翅回風放吟澤畔迨于今十春秋矣而  
鄙人賴有天幸頗與時偶月積歲侵漸踰始望由此  
觀之則進不必賢退不必愚達者非才困者非駑各

信乎命之驅也則司馬季主之論非邪始公在臺中  
時有質介之轂流在衆口久而未泯今日 朝廷徵  
遺居多跣跑之士以謂能解紛批難期在集事而不  
恤其他矣公守躬若處子奉法如循墨治世之良臣  
廟堂之儀範也以故論薦不逮名不上徹非世罕知  
已知已者固多也然此指思以書達者幾卒坐風阻  
恐高明或謂漢廷無如楊得意者遂此布之耳鄙人  
南圖卜在秋爽之候冀與公爲渭上之會屢風昔之  
好肯許之乎日下麥黃公居田中視刈坐茂林咏南  
風與農夫野老班荆論歲鄙人誠羨之宦塗風雨不



期若頻年所聞睹者可知已田家憂不稔何旣之慮  
也使歸卒卒附具中曲不能盡不能盡

槐野先生存言稿卷之三十三